



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

ig tiryimym@aolima

yt tir yimym

TAPAK 7

**Minister Hazarika-i Biswanath aser
Sonitpur nung land pattas agütsü**

**Israel PM-i rara sülen Gaza
atema sentong yanglur**

VOL. XXI ISSUE NO. 133 (ADOK 133) DIMAPUR AMUNGNÜ (SUNDAY) TSÜKLAI (FEBRUARY) 25, 2024 ₹ 5.00

ECI-i ketdangsürtem transfer asüba nenshir

New Delhi, February 24, 2024 (Agencies): Lok Sabha elections agütsü mapang tonga aruba mapang Election Commission of India-i February 24, 2024 nü state sorkartem dang district ka nung küm asem tashi inyaka aruba ketdangsürtem kasa parliamentary constituency nung tanga district-i transfer meyoktsü metetdaksüogo.

State sorkartemi ketdangsürtem kasa constituency nung dang mapa belenba süoki ia bilemer. Ketdangsürtemi elections nung timtem magütsüsü atema lateta aliba

transfer policy sülen anidaksü metetdaksür ta ECI-i ashi.

Pei home district nung lemezüka alir mesüra tesem ka nung küm asem abensaa inyakba ketdangsürtem elections matongdang transfer asütsüla ta ECI policy nung lateta lir.

"Parliamentary Constituencies ana aliba States/UTs dak alaka tanünga state ajak nung district ka nung ketdangsürtem kasa Parliamentary Constituency nung transfer masütsü tetuyuba agütsür. Commission indang transfer policy sülen anidaksüla" ta ECI sangdong ka nung ashi.

Khristantemi mulungba ama school lapoktsü temeten lir: Adivasi lennir

Guwahati, February 24, 2024 (Agencies): Assam nung Christian missionary schools anema poster campaign agiba mapang ka nung Adivasi nung Khristan lennir kati Khristantem dak temeten aliba metetdaksüogo.

Khristantemi mulungba ama school aser shisaliok rejutem lapoktsü temeten lir ta pai ashi.

Sanmilito Sanatan Samaj ta ser Hindu telok kati Guwahati, Dibrugarh, Barpeta, Jorhat, Sonari, Sivasagar aser tangalen missionary tem dang missionary schools nungi noksatem aser chapels agientsü tetuyuba agütsüogo. Sanmilito Sanatan Samaj-isa shisaliok rejutem tamangba yimsü maparen inyakdak makümtsü metetdaksüogo.

Parnokisa Christian Fathers aser Sisters dang school tem nung tamangba yimsü subotsütem masü saka normal dress asemtsü takhangba agütsüogo.

"School tem tamangba reju ama mamshitsü iba ya tatabangba temetetsü sangoktsür. School nungi Yisu Khrista, Mary, kangki, tenla ki amala agienang aser anti-Bharat aser temzüngi memelaba maparen inyakba anenang" ta Assamese oshi nung züluba poster nung shia lir.

Hindu activist Satya Ranjan Borah-i aniba Kutumba Suraksha Parishad ajanga anogo 10 züngzüksüba tembangba sülen poster campaign tenzükogo.

Kutumba Suraksha Parishad-i missionary schools aser tanga shisaliok rejutem nungi Yisu Khrista, Mary aser Kangki agientsü tetuyuba agütsü.

"Ibala takhangba ya temenüntsüka aser temzüngi

memelar. Iba ama ashishitep ken o adokba atema sasa bilemer" ta North East Regional Catholic Council (NERCC) nung taoba executive member aser All Adivasi Student Association of Assam (AASAA) nung taoba tir Raphael Kujur-i ashi.

"Constitution of India kübok Khristantemi mulungba shisaliok rejutem lapoktsü temeten lir. Missionary school tem ya Constitution kübok inyaksangshir. Arrla 29 ajanga nübo agi tangar memepertemi tamangba yimsü mesüra oshi nung ajemdaker parnoki mulungba shisaliok rejutem lapoktsü temeten agütsür. Talisa Arrla 30(1) ajanga nübo agi tangar memepertemi tamangba yimsü mesüra oshi nung ajemdaker shisaliok rejutem lapoktsü melar" ta Raphael Kujur-i metetdaksü.

"Assam nung tawa missionary schools amokmerenba atema sasar aser tai tongloksüba onük ajak tiyazü anungji aitsür" ta paisa ashi.

"Missionary schools dak tai tongloksürtemi tesüiba küm 200 tashi missionary schools-i linük nung shilem tajung agia aruba memetet. Item school ajanga kin mesüra tamangba yimsü telemsa kecha melii linük nung nisung ajak nem tajanzük agüja arur" ta Kujur-isa ashi.

"Missionary school temi Hindu, Musli, Sikh, Buddhist aser Khristan tajung kaka akümtsü atema teti tesayuba agütsür" ta paisa shisem.

"Missionary schools nung tesempatem mali. Khristan yimsü nung tiyongsü tamangji temeim lir. Linük yangerba maparen nung missionary schools-i shilem tajung agiba sensatsür" ta Raphael Kujur-isa ashi.

Dimapur nung Sekrenyi-cum-Mini Hornbill Festival among



February 24, 2024 nü DDSC stadium nung Chief Minister Neiphiu Rio den Deputy Chief Minister tem- Y. Patton o T R Zeliang den külem MLA temi Sekrenyi benjung nung Unity dance tsüngsangba angur.

Dimapur, February 24, 2024 (TYO): Angami nungertem asoshi tongtipang benjung Sekrenyi tanü Dimapur nung kanga longsotepa mongogo.

Angami Public Organisation (APO)-i February 24, 2024 nü Dimapur District Sports Complex (DDSC) nung Sekrenyi-cum- Mini Hornbill Festival ayonga among.

Iba benjungmong nung Nagaland Chief Minister Neiphiu Rio-i tongti tesemdang ama shilem agi.

"Sekrenyi ajanga nübortem kibong ka akümba sayur. Iba benjung ajanga temang merüktetba aser shisatsü asüngtetba sayur. Asenok külemi senmangtepa aruba asentenshitsüla aser Sekrenyi tangatetba nung tali longjemtsüla" ta CM Rio-i ashi.

"Sekrenyi benjung amongba ajanga asenok longjema alitsü tamendakdak akangshitsü aser asen nübortem tarutsü tajungleni anitsü amanger" ta paisa ashi.

"Asen sobalibatem ya asen tashi tulutiba lir. Asenoki asen state nung aser tangalen alirtem indang sobaliba agizükdi aser kati

ka sobaliba akhümtsübuttsüla" ta CM Rio-i ayongzük.

"Mini Hornbill Festival ayongzükba nükjidongji tourism ajungkettsü, Nagaland nung aliba Naga kin ajak nem maangka kasa agütsüsü aser kin balala indang sobaliba sayutsü atema lir" ta Deputy Chief Minister Y. Patton-i ashi.

"Nübortemi iba benjung ya asen loktiliba meshitetsü aser asüngtettsü atema amongtsü ayongzük. Asen loktiliba nung telongjem tali adoktsü aser kidangertem tsüngda tesentaktep akangshitsü atema mongdi" ta Y Patton-i ashi.

"Naga loktiliba nung telemsa kecha mali saka alinük balala asübayong asenoki Central Nagaland, ENPO, Tenymia ta lemsatsü tenzükogo. Asenok alinük balala nung liaka asenok ajak Naga nungertem dang lir anungji asenok kati ka den putepa alitsü aser kati nungitetsü merangtepedi" ta paisa ayongzük.

"Kohima district adener Sekrenyi amongba ya kanga dang shisa kaa lemetetba ka lir. Tanga kintemia iba ama inyakyim tenzükra Dimapur ya tourist

destination tasen ka akümtsü aser küm piyong City of Mini-Hornbill Festival akümtsü ana nung lir. Iba ajanga Kisama nung Hornbill festival mapang dang masü saka küm piyong tourist temi Dimapur semdangi arutsü" ta Deputy Chief Minister T R Zeliang-ia ashi.

"Iba benjung ajanga Angami nungertem sasep nung dang masü saka Indo_Naga tebilemetsü angatetteptsü atema Naga kibong nung telongjem adoktsü amanger" ta TR Zeliang-isa ashi.

Iba benjung nung tetushi süa jaokertem PHED Minister N. Jacob Zhimomi, Tribal Affairs Advisor H. Tovihoto Ayemi aser Labour Employment and Skill Development Excise Advisor Moatoshi Longkumer nungertem aden.

Sekrenyi-cum- Mini Hornbill Festival ya Angami Public Organisation-i Angami Youth Organisation, Angami Women Organisation, Angami Sports Association, Angami Students Union, Angami Gazetted Officers Krotho aser Angami GB Association den yaritepa ayongzük. Iba benjungmong nung Nagaland Tourism Department-ia teyari agütsü.

Kohima nung "Temporary Red Zone" & "No Drone Zone" metetdaksür

Kohima, February 24, 2024 (DIPR): 14 buba Nagaland Legislative Assembly, 2024 indang session pezübuba agütsü aliba atema Assembly Secretariat Complex aser temeket "Temporary Red Zone" ta sangoktsüogo.

Ministry of Civil Aviation, Drone Rules 2021 nung Section 24(2) kübok agüja aliba tashi amshia

Superintendent of Police, Kohima-i February 25, 2024 nikongdang 5:00 ako nungi February 27, 2024 nikongdang 5:00 ako tashi "Temporary Red Zone" alitsü tetuyuba agütsüogo.

Iba ya Assembly Secretariat Complex aser temeket nung kilometre 1 telongtet (aerial distance) atema lir.

Superintendent of Police, Kohima-isa tanga tetuyuba ka nung Assembly Complex aser temeket (1 KM radius) nung kasa mapang "NO DRONE ZONE" asütsü metetdaksüogo.

Drone Rules 2021 nung Rule 4, Rule 22 aser Rule 27 alema inyaksangshirtem ozüng kübok temerenshi alitsü ta paisa ashi.

NCP-i Deputy Speaker S Toiho nem tenüngsang agütsür

Dimapur, February 24, 2024 (Agencies): Nationalist Congress Party (NCP) President Praful Patel-i Nagaland Legislative Assembly nung Deputy Speaker Toiho Yeptho nem tenüngsang agütsüogo.

"Toiho-i par 33 Suruhuto constituency aser Nagaland nung alirtem bendanga agüja aser tenanzükba tajung yur tenzükba atema tenüngsang agütsür. 14

buba NLA nung pai Deputy Speaker inyaka aotsüba moatsür" ta Praful Patel-i ashi.

Maneni, NCP National General Secretary Sunil Tatkaria Nagaland MLA Toiho Yeptho nem tenüngsang agütsüogo.

Nagaland nung NCP MLA temi Ajit Pawar'er telok pusemba atema disqualification petition ka benokba NLA Speaker Sharingain Longkumer-i

magizükba sülen anogo ishika lir Deputy Speaker election nung Toiho Yeptho-i takok ngua liasü.

February 26, 2024 nü 14 buba Nagaland Legislative Assembly indang session pezübuba nung pai Deputy Speaker inyakttsü tezüngzükteptem agütsü.

Nagaland Legislative Assembly nung NCP MLA 7 lir aser parnoki NDPP-BJP telokteptem sorkar pusemer.

NCC Band Cadets nem tenüngsang agütsüba sentong agi



Dimapur, Tsüklai/February 24 (TYO): Nagaland nungi Republic Day Parade 2024 nung shilem agiba NCC Band Cadets nem tenüngsang agütsüba sentong ka Dr. Imkongliba Ao Hall, Raj Bhavan, Kohima nung February 23, 2024 nü agia liasü.

Iba sentong nung tesemdanger tongti ama Nagaland Angh La Ganesan aden, koba Department of Youth Resource & Sports, Kohima & NCC GP Kohima ajanga ayongzüka liasü.

Iba sentong nung Angh-i jembidang Republic Day Parade 2024 mapang NCC girls band temi tajungtiba nung shilem agiba atema pelaba lemsatepa liasü aser Nagaland nungi cadets 31-i pei sempet sayua parade nungi shilem agitsü nükjilding aliba nung takok ngutetba asoshi tenüngsang agütsü.

Iba sentong nung shilem agitsü ya NCC cadets ajunga indang mangdang lir aser nisung ishikati iba mangdang ataloktetba rongnung nenok ya lir, ta ashi.

Cadets lanurtem tajungtiba nung anitetba atema pai Nagaland sorkar, Department of Youth Resources and Sports aser NCC indang North East Region Directorate nem tenüngsang agüja liasü.

Iba ama teyari agütsüba ajanga item cadets lanurtem

tarutsü nung tajungtiba nung takok angutsü asoshi meranga inyaksü ajungmesotsü aser asen linük nung senso tajung akumtsü, ta Angh-i ashi.

New Delhi nung Republic Day Parade ama sentong tulu nung shilem agitsü asoshi temulungtetba tulu nungdaker, kechiaser ibai asenok diversity, tashi aser telungjem benjongba lir, ta Angh La Ganesan-i nenshia ashi.

Tebour tajung Nagaland state nungi tetsür NCC 31-i tatishitsü tajung sayua asen sobaliba tasü ita sayutetogo, ta ashi.

Parnoki iba jenjang tongtetba asoshi Nagaland indang Angh ama tejak tenteter aser lanurtemi iba ama tayongzüka tulu takok nung ajangtetba ngua ajungmesor, ta pai ashi.

Iba sentong nung Nagaland Chief Minister Neiphiu Rio-i jembidang Nagaland nungi NCC cadets temi otsü yanglua mezüngbuba NCC Girls Brass band nung shilem agiba ngua pela liasü, ta ashi.

Maneni New Delhi nung Republic Day Parade mapang Naga tsür Ruyangunuo Kense-i Delhi police aniba ya state asoshi tejak tentetba mapang ka liasü, ta pai ashi.

Parnok training agiba yimya aser maparen balala inyakba ajanga talisa NCC C Certificate special entry schemes alirtem armed forces nung officer ama

adentsü maongka agütsür, ta CM Rio-i ashi.

Linük nung armed forces ya ajaki akumtsübor, nükshir aser inyakner, anungji cadets temi armed forces nung adentsü bilemstüla, ta pai ayongzüük.

Sentong nung Maj. Gen Gagan Deep ADG, NCC NE Region DTE ajanga o tatsüka jembidang cadets 31 ya merit nung ajemdaker shim aser tarutsü nunga cadets tem nem iba ama maongka agütsüsü, ta ashi.

Nagaland Angh-isa iba sentong nung cadets ajunga nem Certificate of Appreciation amokja liasü.

Advisor, Youth Resource & Sports, S. Keoshu-i pela agizükba o jembidang 2024 Republic Day Parade nung shilem agia state nem konang bener arutsüba asoshi pelaba lemsatepa liasü.

Pai cadets tem dang maneni meranga inyaksü ayongzüük.

Iba sentong nung menden ya Commissioner & Secretary, YRS, Wezope Kenye, IAS liasü aser Brigadier Dipankar Saha, Group Commander NCC Group, Kohima ajanga melepzüing o jembi.

Iba sentong nung Abhijit Sinha, Principal Secretary and Home Commissioner Nagaland, NCC ketdangsur, Principals, Associate NCC officers, Cadets aser tsürabortem dena liasü.

Nagaland Angh La Ganesan-i Sekrenyi benjongsalem lemsatep

Dimapur, Tsüklai/February 24 (TYO): Angami nunger adianu aser adianutsürtem dangi Sekrenyi benjongmung tenüng nung salem abener, ta Nagaland Angh La Ganesan-i sangdong ka nung ashi.

Iba temeshi mapang ya asen sobaliba tajung nung tera yanga lir aser ibai mürektetba, meshitetba aser telungjem tali akangshiba mapang lir.

Nenoki iba benjong külem-kija aser lokti chia-jemba nung shilem agidang ni nenok nem

akum agütsür, ta pai ashi.

Nenok azü agi sendaktepa aliba ajanga ner kin aser nenok meketa aliba kin balala den tangatetep aser yimjung nung alitsü tongshi tali akangshitsü imlar.

Nenok ajak dangi tepela Sekrenyi benjong salem abener. Iba benjong ajanga nür tanüla tashi itshitsü, kin tali akanga alenteptsü aser alima dang ner ayak sayutettsü sarasadema atar, ta Nagaland Angh-isa ashi.

Nagaland Police aser Bank of Baroda tsüngta MOU zülutep



Dimapur, Tsüklai/February 24 (TYO): Bank of Baroda aser Nagaland Police tsüngta February 23, 2024 nü corporate social responsibly (CSR) kübok memorandum of understanding (MOU) ka zülutepa liasü, kong special police forces salary package agütsüsü.

Iba scheme kübok on-duty aser off-duty nung aliba salary personal atema personal accident insurance angati agütsüsü, police chirtem atema

higher education atema teyari agütsüsü, tasü mang belenshiba nung yaritsü, arishi küm 18 nungi 80 tashi mesüra retirement age tashi PAI cover agütsüsü aser active operation nung alirtem asüba atem personnel accident insurance ya agütsüsü.

Iba MOU yagi police personnel nem senotsü tsütsü teyari agütsüba aser lendong timtem ajuruba mapang insurance agütsüba nung yarutsü.

Kohima College & Sazolie College nung NCAP tenzük



Kohima College, Kohima nung February 21, 2024 nü National Clean Air Programme tenzükba sentong nung ADC Kohima, Rhoietho Nguori-i jembidang tangokba noksa nung angur.

Dimapur, Tsüklai/February 24 (TYO): District Administration, Kohima ajanga Zub-Zub India den lungjemer Kohima College aser Sazolie College, Kohima nung February 21 aser 23, 2024 anogotem National Clean Air Programme (NCAP) sentong tenzükba liasü.

Kohima College nung iba sentong nung Additional Deputy Commissioner Kohima, Rhoietho Nguori, NCS aser Sazolie College nung Deputy Commissioner Kohima, Kumar

Ramnikant IAS dena liasü aser kaketshirtem dang mopung menenba ajemdaktsüsü asoshi ajaki shilem agitsü ajungshia liasü.

Iba sentong kübok classroom lectures ajanga kaketshirtem nem mopung menenba angatetdaktsüsü, general awareness classes, reels making competition, outreach maparen, cycling competition aser tajangshibatem lemsatepba classes ajanga general awareness agütsüsü.

LFI kaketshir ana nem DDSY Philately Scholarship agütsü



Dimapur, Tsüklai/February 24 (TYO): Livingstone Foundation International nung azüngser Master Ayush Gupta (Grade-VII) aser Master Parthiv Deb (Grade-IX) nem Department of Posts, Government of India ajanga Deen Dayal Sparsh Yojana Philately Scholarship agütsü.

Parnok nem iba Scholarship ya L. Imtikumzuk, Marketing Executive, Nagaland Division, Department of Posts ajanga

February 23, 2024 anepdang School Morning Assembly mapang agüja liasü, kong parnok tsürabor, kaketshir aser tesayurtem dena liasü.

Iba Scholarship Scheme atema kaketshir ana ya Philately Written Quiz aser Philately Projects amala nungi shima liasü, koba kaketshir temi Directorate of Posts nem agütsü.

Philately Written Quiz sentong ya LFI Campus nung September 30, 2023 nü agi,

kong kaketshir 100 dak temai shilem agia liasü.

Kaketshirtem rongnung Philately nung tejangraba tali adokdaktsüsü nükjilding nung Ministry of Communications, Government of India kübok Department of Posts ajanga Deen Dayal SPARSH Yojana (Scholarship for Promotion of Aptitude & Research in Stamps as a Hobby) nungja agütsür Philately Scholarship Scheme ya November 3, 2017 nung tenzükba liasü.

Lok Sabha election atema Cong aser AAP nati state 5 nung longjemmer



February 24, 2024 nü New Delhi nung AAP lenirtem- Saurabh Bharadwaj, Atishi Singh aser Sandeep Pathak nunger den Congress lenirtem- Mukul Wasnik, Deepak Babaria aser Arvinder Singh Lovely nungeri osangbenertem den jembiba sülen tangokba noksa nung angur.

New Delhi, Tsüklai/February

24 (Agencies): Opposition teloktep INDIA nung densema aliba party ana- Congress aser Aam Aadmi Party (AAP) nati taruba Lok Sabha election nung Delhi nung longjemmer tokteptsü atema menden lemsaogo.

Delhi nung AAP-i menden pezü nung tokteptsü aser Congress-i menden asem nung tokteptsü, ta külem sangdong ka ajanga metetdaksü.

Taruba election nung AAP-i New Delhi, South Delhi, West Delhi aser East Delhi mendentem nungi tokteptsü aser Congress-i Chandni Chowk, North East Delhi aser North West Delhi mendentem

nungi tokteptsü.

Delhi Congress Tir, Arvinder Singh Lovely-i, opposition teloktep INDIA nung AAP aser Congress na ya tashitait party ana lir, ta metetdaksü.

"Lok Sabha election nung INDIA teloktepi Delhi nung dang masü saka linük tesem ajaklen longjemmer tokteptsü," ta Lovely-i metetdaksü.

Ano külen Congress-i AAP nem Haryana nung Lok Sabha menden ka aser Gujarat nung menden ana lemsütsüogo. Haryana nung AAP nem Gurugram mesüra Faridabad menden lemsütsütsüa akok aser Gujarat nung menden ana- Bharuch aser Bhavnagar

lemzüksü.

Congress aser AAP natisa taruba Lok Sabha election nung Chandigarh aser Goa na nung lokteper tokteptsü, ta metetdaksüogo.

Tan hopta tetenzüklen Congress aser Samajwadi Party natia Uttar Pradesh nung longjemmer tokteptsü atema party ana tsüingda menden lemsaogo.

Uttar Pradesh nung Congress-i menden 17 nungi tokteptsü aser tanüingba menden 63 nungji Akhilesh Yadav-i aniba Samajwadi Party (SP) den INDIA teloktep nung densema aliba tanga party tem nungi candidates-i tokteptsü.



February 24, 2024 nü New Delhi nung BJP National Tir, J.P Nadda den party lenirtem taruba Lok Sabha elections atema ayongzükba senden ka nung tangokba noksa nung angur.

Ozüng tasen asem taküm July 1 nungi benoktsü: MHA

New Delhi, Tsüklai/February 24 (Agencies): Honibarnü Ministry of Home Affairs (MHA)-i sangdong ka ajanga, özüng alema inyakba özüng tasen asem- Bharatiya Nyaya Sanhita, Bharatiya Nagrik Suraksha Sanhita aser Bharatiya Sakshya Adhiniyam özüngtem taküm July 1 nungi tenzükä benoktsü, ta metetdaksü.

Item özüng tasen asem ya yaküm December 12 nü Union Home Minister, Amit Shah-i Lok Sabha senden nung benoba sülen December 21 nü agizükä liasü.

Item özüng tasen asem ya British nunger yimsüsüba mapang benokba özüngtem melentsü atema benok; British nungeri yimsüsüba mapang benokba özüng tejen asemji Indian Penal Code (IPC), 1860; Code of Criminal Procedure (CrPC), 1973 aser Indian Evidence Act, 1872 lir.

Özüng tasen asem atema

bills ji yaküm asükwa mongpu Parliament mapang nung agizükba sülen December 25 nü linük Tir, Droupadi Murmu-i agizükä liasü.

Ajisüaka 'gari agi nisung tsükseter ajenba' ken o dak sendakba Arrla 106(2) bo khenpiga atema agiena atar. Iba Arrla nung aibelenertem küm 10 tashi tepuokdak ayutsü akok. Gari mekümdangi aniba mesüra kanga keraa aniba ajanga nisung tsüksetba sülen idangyongjisa ketdangsertem nem iba osang memetetdaksüra temerenshi tulu lir.

Linük tesem ajaklen transporters aser gari anishirtemi Bharatiya Nyaya Sanhita özüng kübok Arrla 106(2) anema longkak aita liasü.

Tang Indian Penal Code nung Arrla 304A kübok gari agi nisung tsüksetra küm 2 tashi tepuokdak ayutsü akok aser senchi achitsü. Ajisüaka özüng tasenba kübokbo küm 10 tashi tepuokdak ayutsü.



February 24, 2024 nü Maradabad nung Congress lenir Rahul Gandhi aser Priyanka Gandhi Vadra nati 'Bharat Jodo Nyay Yatra' nung shilem agidang tangokba noksa nung angur.

Longkak aiter aluyimertemi candle march agi

New Delhi, February 24 (Agencies): Boodhbarnü Haryana-Punjab arrtsülen Khanauri nung longkak aiter aluyimer ka khasetba aser police 12 yiruba sülen aluyimertemi anogo ananü tashi 'Delhi Chalo' march thinena liasü.

Aluyimer lenirtemi, February 29 nü aluyimertemi "Delhi Chalo" march dak sendakba telemtetba kar agia maneni longkak aittsü, ta metetdaksü.

Hokolbar aonung Samyukta Kisan Morcha (Non-Political) aser Kisan Mazdoor Morcha (KMM) senden nung telemtetba kar agiba sülen Honibar aonung aluyimertemi candle march agi aser anogo ana lir February 26 nü aluyimertemi World Trade Organization aser Centre sorkar indang noksatem rongdoka longkak aittsü.

"Longkak aitba dak sendakba taruba sangdongji February 29 nü metetdaksütsü," ta KMM lenir, Sarwan Singh Pandher-i metetdaksü.

Paisa, February 25 nü aluyimertem dak sendakba seminar aika ayongzükä agitsü, February 26 nü World Trade

Organization aser Centre sorkar indang noksatem rongdoktsü aser February 27-28 anogotem nung SKM (Non-Political) aser KMM senden aika amentsü, ta metetdaksü.

Punjab, Haryana, Uttar Pradesh aser Karnataka densema state balala nungi aluyimertem meyirjang aika Khanauri aser Shambhu arrtsü nung adenshir February 13 nungi tenzükä longkak aitdar.

Aluyimertemi sorkar dang alu nungi züsentetba chiyungtsü balala atema minimum support price (MSP) agütsütsü atema özüng ka yanglutsü akhanger.

Punjab nungi aluyimertemisa Swaminathan Commission report ajanga benokba ama aluyimertem aser alu nung aayangertem nem pension agüjang, electricity bill jenjang matutsü, aluyimertem anema benoka aliba ken otem agientsü, 2021 küm Lakhimpur Kheri nung aluyimertem menüngsetba ken o nung aibelenertem nem temerenshi agütsütsü, Land Acquisition Act, 2013 tanaben benoktsü aser 2020-21 küm longkak aitdang asüba aluyimer kibongtem nem senotsü teyari agüjang, ta akhanger.

My Handloom. My Pride
Do visit us at the

State HANDLOOM EXPO (SHE)
HATHKARGHA MELA
Under Aatmnirbhar Bharat Utsav

16th-29th February 2024
10:30 AM to 5:00 PM
FREE ENTRY

At Urban Haat
DIMAPUR, NAGALAND

Participants FROM VARIOUS STATE OF INDIA

Along With Other Special Attractions.....
Delicious Food Court available every evening

ORGANISED BY: Nagaland Handloom & Handicrafts Development Corporation LTD, Half Nagarjan, Dimapur, Nagaland
SPONSORED BY: Office of the Development Commissioner for Handlooms, Ministry of Textiles, Govt. of India, New Delhi



TIR YIMYIM

YIMOBILEM (EDITORIAL)

DIMAPUR AMUNGNÜ, FEBRUARY (TSÜKLAI) 25, 2024

Tashimait akümba

Alima nung nisung taküm alirtem atema lendong tulutiba mapangji Tsüngrem tanüla pei dak nungi pilaa orr aliba mapang asütsü. Anogo shia asenok inyaksangshi nung tebilemtesü ajurur saka akoker. Tangar asoshia asenoki teyari tajung agütsüteter. Tangari asenok dak temulung lemtetter. Makamait aser timtem ajuruyonga tizüktetter aser asenok mulungjang nungi tepela mesamar. Lendongtsüdong agi meketbanga lir saka kecha shisamebulur. Teti tasü ititta dang alir. Ibaji tapi agi masü saka asen dak langka lir. Ibaji asenoki mangur saka aji asen dak aliba Tsüngrem tanüla tashi agi inyaker. Iba jagi asenoki kecha metsübur, shisamebulur aser pelapelaa dang alir. Aji oda, Tsüngrem tanüla pa dak ali tashi Samson-i kecha metsübu aser ajak akok. Filista kin-ia pa makok aser arem shiruru tesashijia pa tsüngdangbo kecha balaka tetsübuttsü aketba shiruru masü liasü. Ajisüaka, kodang pa dak nungi Tsüngrem tanüla pilaa ao, idangji pa tashimait aküm. Ano, Samson atema lendong tulutibaji pai pa dang nungi Tsüngrem tanüla pilaa aoba memetetbaji liasü. Obendanger 16:20 nung ashir, " aser lai ashi, " Filista nunger na bushia arua lir, Samson !" Anungji pa sak aser ashi, " Ni akhi ama küsasa jenteta otettsü !" Kechiyong Kibubai pa toktsüogo ta Samsoni memeteti liasü. Asenoki Tsüngremi ashi mangaba ajanga Tsüngrem tanüla asenok den meliteti aor. Idangji, asenok kanga tashi mait akümer, Asenok temang nunga kodang tashi mait lia tashidak mopongsem agi atonger, asenoki ibaji metizükteter aser shirangadoker. Yamaji, kodang asenok dak nungi Tsüngrem tanüla oadoker tashi meiti lidir, idangjibo tatidang tilaka nunga tsüker aser timtem tilaka atalok nunga tsübur. Iba mapangji asenok atema lendong mapangji lir. Ajisüaka, ano iba dang nungi lendong tulubaji Samson ama, asen dak nungi Tsüngrem tanülabo oadokerser nung asenoki mao ama bilema, Tsüngrem tanüla tashi nung akhi ama inyaksü aser alitsü bilembaji asütsü. Kodang asenok dak nungi Tsüngrem tanüla oa adoker asenoki sarasadema mesütettsü. Akhidangbo, aseni sarasadem nung tashi tulu liasü saka tangbo iba tashiji mali akümtsü. Akhidangbo, asen libaliro ajanga aika temoatsü angu saka tangbo asen taküm ajanga aika metsüdaktsü. Akhidangbo asenok ajanga dang tangar putepdaktsü saka tangbo asen ajanga meputep adoktsü. Tangar ajaki asen dak temulung lemteta liasü saka tangbo asen dak shingaia temulung melemtet akümtsü. Aji oda, asen dak nungi Tsüngrem tanüla tashi aobaji mangur saka asenoki asen taküm nung mapa ajanga metettsü. Iba amaji pei dang nungi Tsüngrem tanüla pilaa aoba memeteti ka aliba mapang, tsükchirtemi Samson melamelaa pua bener ao aser pa taküm yangji sama. Tsüngremi asenok ajak meimer kechiyong asenok pa chirtem, anungji asenok lendong timtem nungi kümzüktsü atema Pai asenok dak Pa tanüla temeshi lidaktsür. Ajisüaka, tanüla temeshi ya temenen mapa inyakdak alitsü makok. Aji oda, kodang Samson ama asenoki Tsüngremi ashi manga temenen mapa inyakdir, asen dak nungi tanüla temeshiji meliteti oa adoker. Ibaji tular aser takar ka tsükchir agi meketbanger lendong nung aliba mapang 'bodyguard' temi toktsür ao ama asütsü. Alima nung ali tashi asenok dak Tsüngrem tanüla alitsübjaji kanga tongtibang asütsü. Tsüngrem tanüla tashi aser teyari medeniang asenoki asen taküm aser kibong anir moutettsü. Tsüngrem tanüla teti asenok dak alitsü asoshi asenoki teti Tsüngrem dang sarasadema Pai mulungba ama alitsüla. Teti asenoki asen mulungjang, asen libaliro aser asen jakla yimya tamajung ali mali, itemji Tsüngrem nem bushidaktsütsüla. Aji oda, teti asenoki Tsüngrem pelatsüsa inyakra, Tsüngrem tanüla asenok den alitsü aser Tsüngrem tanüla asen den ali tashi shingaia aser kechaia asenok maraktettsü aser makoktsü.

OLEMSABANG

Sarasadem Jakla (The Art of Prayer)

~ Miss. Meyinaro

Sarasadem ya tamasüba (timeless) aser akhümtsübuba mapa (practice), koba alima kinük ajaklen pei kija taküm nung asen tetsütebou mapang nungi benshia aruba taküm yimya ka lir. Khristan taküm ka nung sarasademtsü yimya ya kinü tanur asüdong nungi benshir, chiyungba langbang nungi tenzüka tenük shibanger Tsüngrem dang item chiyungtsü meshiteta sarasademba nungi pei mejangba yipden nung mener anogo piyong Pai lendong ajak nungi kümzükba asoshi tenüngsang agütsüba aser aonung piyong ayipjanga mejangtsü asoshi tashi meshiba mapa lir. Nisung jenti asoshi sarasadem ya Tsüngrem dang pelaba sayuba asütsü akok mesüra pei taküm lenmang asoshi teyari nüngdaka mepishiba asütsü akok mesüra Tsüngrem den tesentaktep meyipa yanglushia akangshiba asütsü akok.

Sarasadem ajanga meimchir taküm mulungsentsü taroktiba tenüngdakba aser yongyabatem angatetdaktsür.

Laishiba, koba alima ajunga nung kanga sapua züngshiba O lir, iba nung sarasadem indang kanga jangja aser aroka zülua aliba asenoki angutsü.

* Tsüngrem den jembiba (communion with God): Sarasadem ya Tsüngrem den jembitsü asoshi lenmang lir. Mapang karnung kodang asenoki Tsüngrem pei mulungjang taroktiba agi yongyaa menungra, iba mapang asenoki sarasadem ajanga Pa den jembir (deep longing for God's presence through prayer). Kechiaser sarasadem ajanga asen shi aser tanela jenjang Tsüngrem dangi tali anasa anir.

* Tashi angudak (Source of strength): Kodang asenok meimchirtemi shisabulu aser tejashi ajurur asenoki Tsüngrem dang tashi meshia sarasademer. Tenyar Pauli tasen laishiba nung amangbapurtem dang maneni sarasademtsü indang shia lir. (Thessalonians 5: 17).

* Tenüngsang aser tepela: Laishiba nung sarasadem ya Tsüngrem nem tenüngsang agütsüba ola ka lir. Asenoki kecha nunga temulung matemtsüla, saka ajak nung sarasadem aser tenüngsang agi asenok mepeshiba Tsüngrem nem metetdaktsütsüla.

* Tangar asoshi mepishitsüba (Intercessory prayer) : Ibai Tsüngrem dang pei taküm asoshi masü saka asen metemsortem mesüra tsürabur mesüra ainer taküm asoshi sarasademtsüba lir. Yisui pa nütsüngtem aser amangbapurtem asoshi Gethsemene atsüki nung sarasademtsü. Kodang asenoki tangar ajung aser tangar nüngdakba asoshi sarasademtsür, iba nung tashi tulu lir. Meimchirtemi aiben sarasadem a ola adoka sarasademba nung dang tashi lir ta amanger. Saka kodang asenoki pei mulung nung dang asen mulungsentsü taroktiba agi mepir idangji asen sarasadem kanga takangba aser tejangjaba alir. Asenoki ainakar Eljai Tsüngrem ajurudang mopung agi masü, menoknok agi masü, mi agi masü saka ola tila ka ajanga Tsüngremi pa den jembiba asenoki angutsü. Anungji taküm nung kechi jenjang tia mesüra tezü tebilemba ajuruaka Tsüngrem ola anga Pa lenisüba kübok jajatsü tongtibang lir.

Sarasadem ya tangatetepba aser telungjem asoshi lenmang ka lir (A path to understanding and unity). Nebur tapu balala jenti den oshi balala jembiba lima nung alidang sarasadem tashi ajanga nüburtem den yimjung nung aser tangatetep nung alitsü koka lir. Tamangba tapu balala mapang, aiben, telungjem sarasadem, temeim sayutepba tajungnü aser aotep nung ajemdaker lemsateper. Sarasadem agi meimchir yimya, kintem aser sobaliba balala külemi ka ama bener arutsür.

Sarasadem indang jakla (art) tajungtiba tebilemtesü ji kechi ta süra, Kintem, tamangba yimsü balala küm aika nungi benshia aruba, ajak külemi arur ano tajungtiba yimyatem bushitetta aoba alitsü. Mesüra Tsüngrem den sendaktepba, taküm nung tashi tasen agütsüba, tenüngsang aser tetushi agütsüba, timtem tejashi khuret abenba aser temulung taroktiba agi sarasademba asütsü.

Sarasadem jakla (art of prayer) ya kanga takar lir kobai alima linük aser sobaliba balala nungi pei tamangba aser teimla külemi longjemdaktsür. Iba tamasüba tesayuba ajanga, amangba nüburtem taküm tanela jenjang lenmang nung aser pei taküm oshi koda tongtibang iba indang sayur.

Iba ocet ys Changtongya Town Baptist Arogo nung lanurtemi küm nung khen adokba "Tebenjem Washir" 2023 kaket nungi agiteta adoktsür

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Khristan ka taküm piyong tepuokdak ayutsü obendang agütsü



Fanson Shahid

February 24, 2024: Pakistan kübok Lahore nung Tsüngrem mezüngmeshiba ozüng kübok Khristan ka taküm piyong tepuokdak ayutsü obendang agütsüogo.

Pakistan kübok Punjab Province nung Additional Sessions Court Gujranwala District-i Khristan,

Fanson Shahid taküm piyong tepuokdak ayutsü obendang agütsü.

Arrshi küm 56, Shahid-i social media nung pa tebilemba olen ka lemsatepba sülen pa anema ken o benoka liasü.

Shahid kinüngtsüi, "Yaküm March ita nung ozü kidang kü kinüngbu apuba mapang nung parnoki pa dak mejungi züka liasü. Khristan kati social media nung lemsatepba post ka nung pai Islam ainkar

mezüngmeshia olen ka lemsatepogo, ta pa nem k a n g s h i a nangzükdaksü," ta metetdaksü.

Laisa, "Ozü phone ka sama aser nisung kari iba phone ji amshia Islam yimsü amangertem jashidaksütsüsa post asü alitsü südi, kechiyong kü kinüngbui phone security pass-code mamshi aser pa indang Facebook account-a lapoka dang liasü," ta metetdaksü.

Interview ka nung jembidang Shahid'er aianu, Sonia Shahid-i, "Onoki Shahid atema sarasademja aruogo, kechiyong pai aibelenali, ajisüaka court obendang ajanga onok teimla samaogo," ta metetdaksü.

Fanson Shahid indang phone ji tangar kari tim mesüi amshiba kuli aika lir, ajisüaka court-i Pakistan nung Tsüngrem mezüngmeshiba dak sendakba Arrla 295-C kübok pa aitsü. Iba Arrla kübok aibelenertem nem tasüba temerenshi obendang-a agütsütsü akok.

Obendang agütsüdang judge-i, facebook post ka nung tebilemba lemsatepbaji khen dang lemsatep, anungji aibelenji kanga tulubo masü, ta metetdakja tasüba temerenshi obendang masü saka taküm piyong tepuokdak ayutsü obendang ang

agütsü. Iba dak alia Shahid dang senchi 100,000 achi.

Tanga Arrla nunga pa aitsüogo; item rongnung yimsü nung ajemdaker tanger melung yirutsüba, yimsü balala amangertem rara adokdaksütsüsa inyakba aser social media ajanga yimsü nung ajemdaker tesempa ajungkettsüba densema lir.

Item ken o nung Shahid aitsüba sülen Shahid kinüngtsü den tanur anati tetsübu nung pei ki toktsür jenogo.

Court obendangji aija Khristan lawyer, Lazar Allah Rakha-i, Shahid anema kuli agütsürtem oji memedem aser pa anema kuli tejangja mali, ta metetdaksü.

Paisa, court nung Shahid anema kuli tejangja magütsütet, anungji shidakba agibo pa maitsüi chioktsüla, ta ashi.

Pakistan nung T s ü n g r e m mezüngmeshiba ozüng kübok Khristantem densema minorities nem tai tonglokja apuba kanga bulua ataloker. Yaküm August ita nunga Pakistan kübok Jaranwala nung Khristan anati Quran temeshi kaket raksatsü, ta tai tonglokja Muslim nungertemi longkak aidang Tenla ki aika rongdoktsüba den külemi Khristan meyong ki aika rongdokja liasü.

ANOGO ABEN TSÜNGREM DEN

NINEVE NUNGER MESÜKA AJEMALUDI

Saka nisung aser shiruruna prongla anem sü abendakjang aser Isüngrem dang tashi agi parnoki ayimtendakjang... aser parnokshia pei lenmang tamajung nungi meyipdakjang.

-Yona 3:8b

Meimchir asoshi aiben melamelaa meinyaktetba mapa tasak kaji, tila küma ajemalu mesütetba ya lir. Koba ajanga taküm ka akümüli nung maongka tajung aika süidaktsür. Tila küma ken maremsüktetba ajanga kibong nung apuani tsüngda mangatettep adoka balaluyu adener, medemer tembar adianu tsüngda tesendaktep teti asoshi raksadoker. Nineve yimti nübor samatsütsü kodang Tsüngrem nungi Yona ajanga osang sangoktsü, chubai anir nübur ajak, oda kiset shiruru tashi mechimejemi tila küma aoyi nung jiloka pei tai temenen tatok nangzükmeso, yamaji kodang parnoki tila küma temulung meyipa tatok nangzük, Tsüngremi aochia Nineve yimti nübur tesama tulu nungi kümzük.

Tila küma ajemalutetba aser aremsükba süngjang ya kanga tanang aser iba yagi tesama tasüba nungi pilaa tatem maka kotak senmang ajangzükttetsü maongka agütsür. Arung, Nineve nunger ama asen tashi mait mokokmintem bener tila küma ajemalua asen Tsüngrem nungi tatok bushitsü angazükdi.

Temeim Tsüngrem, ne madang teti ajemalua kümteba tamanger ni kümdakjangma. Amen.

Meghalaya nung nun ka mezüngmeshiba anema Arogoi ola adoker

February 24, 2024: Tawa Meghalaya state nung nun ka bus nung mezüngmeshiba sülen bus nungi meindokba anema Arogoi state sorkar dang aibelenertem nem temerenshi agüjang, ta takhangba agütsü.

Tura Diocese-i, Daughters of St. Francis de Sales nung züngsem, Sister Rose Mary bus ka nung Meghalaya kübok Duhnoi nungi Assam state kübok Goalpara-i aoba mapang nung nisung kari la mezüngmeshiba sülen bus nungi meinzüka yok; la ket nung ticket-a liasü, ta metetdaksü.

February 17 nü bus nungji Hindu nungertemi tamangba yimsü nung ajemdaker la mezüngmeshiba sülen bus nungi meinzüka yok, ta Arogo

ket dang ser tem i metetdaksü.

February 22 nü osangbener den jembidang Tura nung Auxiliary Bishop, Jose Chirackal-i, parnoki iba tatalokba osangji Meghalaya Chief Minister, Conrad K. Sangma nem metetdaksüogo aser iba tatalokba bushisüngdangtsü atema takhangba agütsüba den külemi Chief minister dang Assam Chief Minister Himanta Biswas Sarma nem-a iba osangji metetdakjang ta mepishiogo, ta metetdaksü.

"La bus-i atuba sülen khenpiga kecha mesüi ao, ajisüaka tatsüka lirbo bus nung külem passenger temi la mezüngmeshi tenzük aser la yimsü (Khristan) tiluja jembii.

Nisung maliba tesem ka nung la bus nungi meinzüka yok, ajisüaka lai ano tanga bus ka nung Goalpara atong. Iba tatalokba ajanga la kanga aoksaogo," ta C h i r a c k a l - i metetdaksü.

Khristan nütsüng teimba aliba Meghalaya state nung tang secular National People's Party sorkar lir aser Assam nung Hindu pusemba Bharatiya Janta Party (BJP) sorkar lir.

Assam nung nütsüng ajema aliba K h r i s t a n t e m amokmerenba aser reshikangshiba kanga bulua kümogo. Tawa Hindu telok kati Assam nung Khristan school tem dang school tem nung Khristan temaitsütem agientsü tetuyuba agüja liasü.

Bishop Chirackal-i, Hindu teloktemi

amokmerenba aser tang nun ka mezüngmeshiba nungi nungertemi nun ka naji sendaktepa lir, ta metetdaksü.

Hindu yimsü alia am a n g e r t e m mazüoktetba ajanga Meghalaya nung Khristantemi timtem ajurutsü, kechiyong Meghalaya nung alirtem medical treatment densema nüngdak balala atema Assam-i aotsüsa akümer, ta Chirakal-i metetdaksü.

"Onoki ashishiba ken oji Meghalaya sorkari agizükogo aser tarutsü nungbo item tatalokba nokdangtsü atema Assam sorkar den-a jembitsü, ta sorkari onok dang nangzükogo," ta paisa metetdaksü.

February 22 nü Meghalaya state assembly nung Trinamool Congress party nungi MLA, Charles Pyngrape-i

assembly nunga Hindu nungertemi nun ka mezüngmeshiba tatalokba benoka liasü aser chief minister dang aibelenertem aputsüla, ta takhangba agütsü.

Opposition nungi MLA Pyngrape-i, tamangba yimsü dak sendakba sübosolemstü asema amokmerentsü menüngdak, ta ashi.

Ibaji langzüa Chief Minister Conrad Sangma-i pai Assam Chief Minister den-a iba tatalokba indang süoka jembioogo aser aibelenertem anema inyaktsü, ta nangzük.

Nütsüng million 4 shi aliba Meghalaya state nung nütsüng shilem 75 bo Khristantem lir. Assam nung nütsüng million 31 shi lir, aser iba nungjagi nütsüng shilem 3.74 dang Khristantem lir.

AO OSHI ANGAZÜKDAK:

TANÜ ANGAZÜKTSÜBA OJANG



Songdang

(v) Noktang, lenmang aser yimdong mokdang (road block)

* Lenmang majungba agi yimteni songdanga yutsü.

Songersen

(n) nübu züngdangba (census)

* Linük nung küm ter shia songersen khen agir.

OLONG PAITEP # 6708

Grid for crossword puzzle #6708 with numbered starting points 1-16.

TIPIEN

- 2. Auo nung chiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüing
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 6707 TELANGZÜBA

TIPIEN :

- 3. Tatem, 5. Jabaso, 6. Kotak,
8. Alu, 9. Aut, 11. Lungpok,
14. Pua 16. sen, 17. Mitsa,
18. Nükpok, 19. Ozüing.

LANGTSÜNGLEN :

- 1. Ajuru, 2. Jaja, 3. Toktep,
4. Tatsük, 7. Kasa, 10. Alem,
11. Leptsü, 12. nepang, 13. Temko,
15. Aika.

NAI-A YA METETTER MA



United States nung sen teimtiba agütsüba Chief Executive Officers (CEOs) 10:

Table with 3 columns: Rank, CEO, Company. Lists top 10 CEOs from Tesla to Broadcom.

Congress & TIPRA Motha tsüingda IS election atema senden amen



Agartala, February 24, 2024

(Agencies): Lok Sabha elections agitsü jakdang Tripura Congress president Ashis Kumar Saha-i anir lennirtemi Tipra Motha lennirtem den tongtipang senden ka menogo.

Telok ana tsüingda teloktep yanglutsü tebilemba nung senden amen aser Congress o Tipra Motha lennirtem tsüingda tangatettep kati arur ama repranger. Külen Opposition Leader Animesh Debbarma-i

iba dak sendakba olen ka ashiba ajanga parnok lemtet ka agitsü imlar.

Indira Gandhi aser Rajiv Gandhi nungeri Tripura atema mapa inyaksüogo aser Congress-i state tebilemtsütem angateta lir ta Opposition Leader Animesh Debbarma-i ashi.

Congress lennirtem Delhi nung oa central leadership den ajuruteptsü aser Tipra Motha lennirtemia party level nung kasa olemtep agitsü ta

Debbarma-isa ashi.

Tripura Legislative Assembly nung Opposition Leader indang chamber nung senden amendang iba onük lemsatep.

Tripura Congress MLA Sudip Roy Barman-i opposition longjemtsü indang jembi aser Tipra Motha-i akhangba onüktem nenshi.

Tripuri nunger ajak ajangzüksü asoshi külem lemtet ka agitsüla aser Pradyot Kishore Debbarma o Congress tsüingda tangatetba lemsateptsüla ta Roy Barman-isa ashi.

Parnoki CPI-M state secretary Jitendra Chaudhury den tesüiba nung jembiba osang Barman-isa shisem.

Tipra Motha den senden kanga junga menogo aser high command den maneni olemteptsü ta Tripura Congress president Ashish Kumar Saha-i ashi.

Minister Hazarika-i Biswanath aser Sonitpur nung land pattas agütsü

Guwahati, February 24, 2024

(Agencies): Minister Pijush Hazarika-i Mission Bashundhara 2.0 kübok Biswanath aser Sonitpur district tem nung land pattas agütsüogo.

Minister Hazarika-i Bihali nung kibong 3209, Biswanath nung kibong 3804 aser Na Duar nung kibong 4702 nem land pattas agütsü.

Pijush Hazarika ya Water Resources, Information and Public Relations Minister lir aser pai Biswanath o Sonitpur district tem nung Guardian Minister inyaker.

Minister Hazarika-i tamasa Bargang kübok Srimanta

Sankardeva Auditorium atong aser iba constituency nung kibong 3209 nem land pattas agütsü.

Chief Minister Dr Himanta Biswa Sarma lenisüba kübok state sorkari tesüiba küm asem tashi state renloksü atema inyaka arur. Mission Vasundhara kübok kibong lakh 11 shi nem land pattas agütsüogo, ta pai ashi.

Küm ishika tejaklen lisopur aser scheduled castes nisungtemi land pattas zübazüba angutsü teimla kecha maliasü, ta Hazarika-isa shisem.

Assam sorkari küm ana ser tesadang tsüingda sorkar mapa 95,000 jungnua agütsüogo aser

iba ya otsü tasen ka lir, ta paisa ashi.

Guardian minister Pijush Hazarika-i Biswanath aser Sonitpur district tem semdang aser idakji Biswanath constituency nung kibong 3804 aser Na-Dwar constituency nung kibong 4702 nem land pattas lema agütsü.

Prime Minister Narendra Modi lenisüba kübok Centre sorkari aluyimertem asoshi mapa tajung aika inyakogo. Assam nung aluyimer 1200000 shi lir aser parnoki Prime Minister's Kisan Samman Nidhi kübok tajangzük aika angur, ta Minister Hazarika-i metetdaksü.

Vice-President Dhankhar-i Feb 26 nü Aizawl semdangtsü

Aizawl, February 24, 2024

(Agencies): India Vice-President Jagdeep Dhankhar-i February 26, 2024 nü Mizoram yimtiba Aizawl semdangtsü.

Iba mapang Vice-President Dhankhar-i Mizoram University indang 18 buba Convocation nung tongti tesemdang ama

shilem agitsü.

Dhankhar-i 9 buba Mizoram Legislative Assembly nung o jembitsü. Paisa Raj Bhavan, Aizawl semdangtsü.

Honibarnü Vice President Dhankhar-i New Delhi nung aliba Delhi University indang 100 buba convocation ceremony

nung o jembia liasü.


Sentong nung pai lanurtem ayongzuka jembidang pei tajungtiba agi linük tenzüksü ashi.

Delhi University nung graduates-i Vasudhaiva Kutumbakam sobaliba benshia alima ajunga nung tenüing yanglutetsü ayongzük.



Alima nung Meitei nunger network Meitei Alliance-i Centre, state sorkar aser Manipur nung Kuki National Organisation (KNO) o United People's Front (UPF) Suspension of Operations Agreements (SoO) tsüingda sign sütepa aliba agientsü takhangba agütsüogo. Kuki nunger teloktemi SoO nung aliba Agreed Ground rules alema teti inyaksangshir ta Meitei Alliance-i metetdaksü.

Nanjing kitsük-kirong lendong nung nisung 15 asü



China nung Jiangsu province kübok Nanjing city nung nisung aliba ki ka nung February 23, 2024 nü mi adokba sülen tangokba noksa nung angur.

Beijing, Tsüklai/February 24 (Agencies):

China anüdoklen Nanjing nung nisung aliba apartment block ka nung kitsük-kirong lendong ataloka nisung 15 asü aser aika yiru, ta yangji aliba ketdangsür temi ashi.

Nanjing kübok Yuhuatai district nung kitsük-kirong lendong ya Hokulbarnü nisung aliba ki floor mezüngbuba nung adok amai lir, kong electric bikes tem ayur, ta ketdangsürtemi osangbener dang ashi.

Iba mi ya anepdang 6:00 ako tashinung remsep aser Hokulbar nikongdang 2:00 ako meta search and rescue operation tembang ta ashi.

Nisung 44 temang anepalutsü atema mozüki-i yokogo aser ka

kangasa mejungi yirur lir ta ketdangsürtemi ashir.

Iba mi remseptsü atema fire trucks 25 yoka liasü, ta emergency service ajanga ashi.

China nung indang social media nung video tem prokshiba nunga skyscraper ka nung aonung mi adoka aliba aser mokozü tanak adoka aliba nguogo.

China nung kitsük-kirong aser danga lendong kanga ajuru, kong terenlok balala liaka safety standards shidak mamshir.

Taoba ita central China kübok Xinyu nung kitsük-kirong lendong ataloka nisung 39 asüba sülen Tir Xi Jinping-i kisü-jensüba nung lendong majurutsü asoshi mera balala agitsü

ayongzüka liasü.

Central China nung Henan province kübok school dormitory ka nung kitsük-kirong lendong ataloka tanur 13 sür anogo ishika lir Xi-i iba tayongzüka ya agüja liasü.

Iba tatalokba ya ajanga social media amshirtem kanga jashitep aser aibelener merenshitsu takangba agüja liasü.

November ita northern Shanxi province kübok nak-mati atoba company ka indang office nung mi adoka nisung 26 asü aser aika yirua liasü.

October ita northwestern Ningxia region nung barbecue restaurant ka nung mi adoka nisung 31 asü.

Ukraine rara küm ana ajungdang Italy aser Canada leniri semdang



Giorgia Meloni & Justin Trudeau

Kyiv, Tsüklai/February 24 (Agencies): Russia aser Ukraine tsüngta rara tenzüker küm ana ajungdang Ukraine den dena lir ta sayutsü mechi Italy Ato Kilonser Giorgia Meloni aser Canada Ato Kilonser Justin Trudeau na Honibarnü Kyiv tongogo. European Union commission tekolak, Ursula von der Leyen-a Kyiv tongogo.

Ukraine sorkar indang railway service ajanga noksa ka prokshiba nung Trudeau ya Kyiv train station nung liasü. Iba noksa ya Ukraine indang Ukrzaliznytsia railway odongtar kati social media nung prokshia liasü.

Rara tenzüker küm ana ajungba mapang Italy Ato Kilonser Giorgia Meloni lenisüba kübok Ukraine atema G7 virtual meeting alitsü, ta Italy sorkari sangdong ka nung ashi.

G7 indang tir menden melentepba abenba nung tang Italy lir. Iba senden nung

Ukraine Tir Volodymyr Zelensky-a adentsü aser yangji Russia anema tenokdangba tasen agütsütsü indang jembitsü ta ashir.

Russia-i amak tenzüker Ukraine ya Honibarnü küm ana ajunger aser rara indang küm taseni ayaoka aidang anüolen linük temi teyari peria magütsüba ajanga Ukraine tashi ajema kumogo aser Russia ya tang tongpang kar nung takok ngua temulung ulushir.

United States nungi mitar teyari peria magütsüba ajanga Ukraine lenir Volodymyr Zelensky-i meyiper aratsüba nung tamakok ajuru aser Russia mitkar tashi anema raratsü sentongtem nunga tetsükdaksü ajurur.

Russia Tir Vladimir Putin-i February 24, 2022 anepdang "special military operation" ka sangdongdang Moscow-i anogo ishika tsüngta takok angutsü imlaa liasü, saka Ukraine-i

meyiper rara, anungji tesem aika nung Russian sepaitem meyiper ao. Ajisüaka Russia-i Ukraine south, southeast aser eastern tsütsü tongtipang tesem aika amokbanga lir.

Russia-i Ukraine amak tenzüker küm ana ajungba anogo nung Kyiv army chief Oleksandr Syrsky-i tammang madak tesangwa agi takok angutsü ta shia liasü.

"Telungjem ya asenok asoshi takokba lir. Aser aji kechi südir süaka ataloktsü. Kechiaser tesangwa-i teti tammang akoker!" ta Syrsky-i social media nung ashi.

Ajisüaka Ukraine sepaitem nübu agi anünger aser ano artillery aser air defences atema injang-bomb tem anüolen linüktemi agütsüba nung ajema akumer.

Nok-nü agütsütsü asoshi telemtetba agitsü ya tongtipangtiba asütsüla, ta Tir Volodymyr Zelensky-i Hokulbarnü ashi.

Linük anaprongi mitkartem asüba mesüra yiruba indang mashir saka anaprongi takoksa tulu agütsüba indangbo ashir.

2023 küm August ita US ketdangsürtemi The New York Times dang ashiba agi, Ukraine mitkar asüba 70,000 aser yiruba 100,000 nungi 120,000 tashi lir.

December ita US itdangiter indang osang kar temai adokba nung Russian sepa 315,000 tepset mesüra yirur lir ta shia liasü.

Israel PM-i rarasülen Gaza atema sentong yanglur

Jerusalem, Tsüklai/February 24 (Agencies): Israel Ato Kilonser Benjamin Netanyahu-i Gaza nung rara sülen atema pa indang mangdang lemsatapa liasü.

Pa indang sentong kübok Israel-i teti atema security ketdang asütsü aser Israel anemba telok den sendaktepa maliba Palestine nungeri iba tesem nung yimsü asütsü.

Israel asoshi tongtipang tembar, US-i rara sülen Gaza ya West Bank nung amenoka aliba Palestinian Authority (PA) nem yimsü südaksüner.

Saka Netanyahu-i Hokulbar aonung minister tem matsüngdang benokba document nung PA indang shia mali.

Taoba mapanga linük balalai yariba telok (PA) nem rara sülen shilem magidaksütsü shia liasü.

Nüburtem tesunep nung alitsü atema Israel-i mitkar tashi ajunga agientsü aser Gaza ya "demilitarised" südaksütsü ta pai ashi.

Telung nung alirtem aser tema nung alirtemi shibelenba nokdangtsü mechi Egypt den arütsülen "Southern Closure" ka alitsü.

Aser tamangba yimsü, kaket reju aser welfare institutions ajak nung "de-radicalisation" sentong temaba jenjangi ajungkettsü. Iba document nungya iba amala meteta aliba Arab linüktem dendaksütsü ta ashi saka Netanyahu-i linük kata tenüng teta mashi.

Iba sentong kübok Israel-i Jordan anüolen tesem ajunga nung ali, tzüyim aser anünger nungi security azüoktsü.

Linük nung aser bendanga lima nungia Netanyahu dang Gaza atema sentongtem temai adoktsütsü ajungshir.

Ajisüaka Netanyahu indang sentong nung tamakok alutsü ta PA tir Mahmoud Abbas indang odongtar kati ashi.

"Alimai shidakba nung region nung yimchi-yimjung aginera, Israel-i Palestine nunger li rakzüka anentsüla aser Palestine ya independent linük ka ama agizüktsüla," ta Nabil Abu Rudeineh-i ashi.

Anüolen linük temi Palestine nunger linük ka kumtetdaksünüba Netanyahu-i magizüker.

Israel-i Gaza tanaben agiba aser iba litsü ajemdaksüba US-i magizüker, ta US Secretary of State Antony Blinken-i Hokulbarnü ashi.

"Gaza ya kiralongra mapa inyaksü asoshi sapang ka mekumdaksütsü. Yangji Israel nungeri Gaza tanaben magitsü. Gaza litsü tasazük majemtsüla," ta pai Argentina nung G20 minister tem senden nung ashi.

Kasa mapang tetsüngtai ia ken o jembir temi khen asoshi ceasefire alitsü aser Israel



Benjamin Netanyahu

nunger pua alirtem chiochtsü atema Paris nung adenshia jembitsü imlar.

US-i Muslim nunger temeshi ita Ramadan metenzükdang tezüngzüktep ka aginer, koba anogo ishika tsüngta tenzüksü.

Aser Gaza nung tensa tamajungba akumba mapang linük balalai rara tembangtsü ajungshir.

October ita nungi tenzüka Israel mitkar temi Gaza nung tesem balala makyonga arudang nisung 29,606 tepsetogo aser 69,737 yirur lir.

Hamas teloki October 7 nü Israel arütsü alema aita nisung 1,139 tepsetba aser nisung 253 pua bener aoba ajanga Israel mitkari Gaza Strip amak tenzü.

Iba rara nung Israel sepa 237 takum samaogo ta ashir.

Form No.3
[See Regulation-15 (1)(a)]/16(3)
DEBTS RECOVERY
TRIBUNAL GUWAHATI
Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)
Case No.: OA/287/2021
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
To,
Exh. No.: 4116
HDFC BANK
VS
M/S MOUNTAIN MUSIC
To
(1) VICTOR TSUZU
BROTHER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJAN JUNCTION DIMAPUR NAGALAND 797112, DIMAPUR, NAGALAND 797112
(2) DEBORAH TSUZU BELL
SISTER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJAN JUNCTION DIMAPUR NAGALAND 797112, DIMAPUR, NAGALAND 797112
(3) NIKOLO
SISTER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJAN JUNCTION DIMAPUR, NAGALAND 797112
(4) BETHEL TSUZU
SISTER OF LATE MS NITUO TSUZU RESIDENT OF FLAT NO 3 AIKO BUILDING OPP TOWN HALL NAGARJAN JUNCTION DIMAPUR NAGALAND 797112, DIMAPUR, NAGALAND 797112
JAOKER
OA/287/2021 ya Hon'ble Presiding Officer/Registrar matsüngdang 12.02.2024 nung züluoka liasü. Sentüsh sen 4165621.76/- (application den documents balala copy tem inoka lir) menoktsü atema Act, (OA) indang section 19(4) kübok iba Application atema Hon'ble Tribunal ajanga summons/notice agütsür.
Act indang section 19 indang sub-section (4) nung aliba ama na defendants asünung item totuyuba ya agütsür:-
(i) iba sangdong agütsür anogo 30 tsüngta pamoki meshizüka aliba anogo kechiba magütsütsüla; (ii) original application indang serial number 3A kübok applicant-i tejangja shia aliba ki o jen aser rongsen dak alaka danga ki o jen aser rongsen tejangja shiettsüla; (iii) ken o metembang tashi original application indang serial number 3A kübok shia aliba secured assets mesüra iba ama danga rongsen aser ki o jen mayoktsüla aser dangar nem magütsütsüla; (iv) Tribunal nungi temelaba magie original application indang serial 3A kübok shia aliba rongsen tem mayoktsü, dangar nem khen atema mamshidaktsütsü; (v) ordinary course of business nung secured assets mesüra danga assets aser ki o jen tem ayokba nungi aruba sen tem item rongsen mechi security interest aliba bank mesüra financial institutions temi amshiba account nung inoktsüla. Na tezuluba nung statement agütsütsü aser Presiding Officer matsüngdang 05.04.2024 anepdang 10:30 ako nung arua nokdaksü totuyuba agütsür aser yamaji meinyakra na meliaka ken o jembitsü aser telemtetba agitsü. Iba 19.02/2024 anogo iba Tribunal tenüng nung ni meyonngem aser seal agütsür.
Sd/- Registrar,
Debts Recovery Tribunal
GUWAHATI

4th KIUG wrestling competition tenzüker anogo ana jungogo



Kohima, Tsüklai/February 24 (TYO): Nagaland-i Indira Gandhi Stadium Kohima nung ayongba Khelo India University Games (KIUG) wrestling event Honibarnü agi ananü buba asaya nung teburtem asoshi Greco-roman aser free-style aser tetsürtem asoshi free-style telesa nung shilem agia liasü.

Iba sentong ya Deobar nikonngang 6:00 ako nung tembangsü, kong Nagaland Angh La Ganesan-i moatsütsü.

Asemnü asayamung sentong ya Department of Youth Resources & Sports ajanga Nagaland Wrestling Association den külemi ayongzüük, kong state balala nung aliba university 100 dang Naga nung yimya nung melangtepba sayur.

Mezüng anogo ana indang results yamai alitsü:

Freestyle Seniors (74 kg) Gold: Goverdhan Jat (Devi Ahikya Vishwavidyalaya) Silver: Vikash (SunRise University) Bronze; Ankit (Guru

Jambheshwar University) Freestyle Seniors (65 kg) Gold: Pardeep (Shri Kallaji Vedic Vishwavidyalaya, Chittorgarh) Silver: Jasbir Khatkar (Punjab university Patiala), Bronze; Atul (Guru Kashi University)

Greco-Roman Senior (97 kg) Gold: Yashveer (Guru Jambheshwar University) Silver: Ganesh Bramhadev Chavan (Punyahlok Ahilyadevi Holkar Solapur University) Bronze: Sonu (Chandigarh University)

Greco-Roman Seniors (72 kg) Gold: Naveen (Veer Bahadur Singh Purvanchal University) Silver: Anil (Maharshi Dayanand University) Bronze: Sachin (Chandigarh University)

Greco-Roman Seniors (63 kg) Gold: Pawan (CBLU) Silver: Hariom Puri (RTU) Bronze: Ankit (Guru Nanak Dev University, Amritsar)

Women's Wrestling Seniors

(62kg) Gold: Pragati Vinod Gaikwad (BVUM) Silver: Nitika (DAV University) Bronze: Vaishnavi Dilipppatil (University of Mumbai)

Women's Wrestling (72 kg) Gold: Manju (Chandigarh University) Silver: Varsha (Chaudhary Devi Lal university, Sirsa) Bronze: Tanu Sharma (Panjab University)

Seniors Women's Wrestling (59 kg) Gold: Manju (DAV University) Silver: Nitika (Chandigarh university) Bronze: Deepti (Panjab University)

Seniors Women's Wrestling (53 kg) Gold: Nancy (CKU) Silver: Kirti (Lovely Professional University) Bronze: Sheetal (Chaudhary Bansi Lal University, Bhiwani)

Freestyle Seniors (92 kg) Gold: Sachin (Chandigarh University) Silver: Himanshu Antil (Deenbandhu Chhotu Ram university of Science & Technology) Bronze: Prateek Fougat (Singhania University).

Asangma Students' Union-i Open Penalty Shootout ayongzüük



Dimapur, Tsüklai/February 24 (TYO): Platinum jubilee benjongmung nungtem nung Asangma Students' Union ajanga Open Penalty Shootout sentong ka Dimapur District Sports Complex (DDSC) nung February 24, 2024 nü ayongzüük liasü.

Iba sentong nung Dimapur aser Chümoukedima district nungi team 30 dak temai shilem agia liasü.

Iba sentong tenzüka nung tesemdanger tongti ama Ao Kaketshir Telongjem Dimapur tir Imnatemsu Pongen-i shilem agia liasü. Pai iba sentong nung o tatsüka jembidangh, football asaya nung penalty shoot-outs ya tongtipang shilem ka kumogo aser küm ishika tsüngta nüburtemi

kanga sapua kumogo, ta ashi.

Lanurtem rongnung football asaya temaba jenjangi ajungkettsü asoshi iba amala tetoktepba mapang shia ayongzüüksü pai ajungshia liasü.

Iba asayamung indang organising committee tayonger Bendang Imsong-i ashiba agi, iba asayamung nung shilem agitsü asoshi Aor tem kisüng masü saka Dimapur aser dangalen nungia telok balalai arua shilem agitsü tenüng agüja lir, ta ashi.

Iba asayamung ya Asangma Students' Union jubilee sangdong nung shilem ka aser iba benjongmung asoshi senotsü bendentsü nükjidong nung ayongzüük, ta ashi.

Iba benjongmung ya December 2024 nung agitsü

sentong lir. Iba sentong nung Dimapur Naga Students' Union nungia ketdangsürtem dena liasü.

Mezüngbuba shootout ya DABA Youth Ministry aser Asangma Students' Union tsüngta asaya liasü.

Final nung Royal FC aser Power Kicker tsüngta penalty metsütepba nung Royal FC-i takok ngua senpet sen 50,000 bener ao aser Power Kicker-i senpet sen 30,000 agizüka liasü.

Duncan Basti team nungi Nahing Zeliang-i best shooter aser Power Kickers nungi Ato-i best keeper sempet agizüük.

Iba asayamung tenzüka Rongsenkala-i sarasadem aser Lanuinla Lemtur-i temeja ken ka tena liasü.

Football: Spain tsür Olympic atema qualify süogo

Seville, Tsüklai/February 24 (Agencies): Spain-i ayong ayongba Women's Nations League semi-final nung Netherlands tsükdakja parnok asoshi Olympic qualification mezüngbuba ajangettogo.

Iba asaya Seville nung asayadang world champions, Spain-i 3-0 agi Netherlands akok aser taküm meyi mapang Paris nung asayatsü asoshi jenjang ajangzüük.

La Roja asoshi Jennifer Hermoso, Aitana Bonmati aser Ona Batlle nungeri goal ka-ka agüja liasü.

Ajisüka Netherlands yagi Bodhbarnü third place atema asayaba mapang Germany madak takok ngutetra parnok Paris 2024 tongtetsü.

Asaya tenzüker minute 43 buba nung Bonmati-i yokba pass ka Hermoso-i agizüka goal yok aser minute ana lir Mariona Caldentey-i cross ka yokba Bonmati-i agizüker goal ka yoksem.

Taoba mapang Manchester

United nung full-back asayala Batlle-i minute 77 buba nung goal tasembuba agüja Spain asoshi takok bener arutsü.

Olympics hosts ama France ya pasasa qualify asür aser Hokulbarnü danga Nations League semi-final ka nung Germany madak 2-1 agi takok angu.

First half nung France asoshi Kadidiatou Diani-i goal ka agütsü aser iba sülen Sakina Karchaoui-i penalty spot nungi gial ka agütsü, saka Giulia Gwinn-ia asaya atemtsü minute t ilia Germany asoshi goal ka agüja liasü.

Olympics nung Netherlands ya khen dang asayadanga lir aser ibaji 2020 küm quarter-finals tashi asayar tsük. Bronze medal asemnen nguteta aliba Germany ya Brazil nung 2016 küm gold anguba sülen qualify mesüdag.

Final ya Seville nung Bodhbar aonung 6:00 (GMT) nungi asayatsü aser third-place play-off ya kasa aonung Heerenveen nung 7:45 ako (GMT) nungi asayatsü.

Dubai Open: Semi-final nung Iga Swiatek tsükogo



Hokulbarnü Dubai Open semi-final asaya nung Anna Kalinskaya-i Iga Swiatek madak takok anguba sülen Swiatek jashiba noksa nung angur.

Dubai, Tsüklai/February 24 (Agencies): Hokulbarnü Dubai Open semi-final nung Anna Kalinskaya-i 6-4, 6-4 agi tsükdaktsüba atema Iga Swiatek-i anibeimba nung tenüng asen aser la dak tashi mali ta ashi.

Swiatek-i match tenet nung tamakok khen danga majurui aruba otsü Kalinskaya-i raksatsü aser world number one akumtsü meranga asayaba tatem kati aruogo.

"Küdak joko tashi mali kumogo, aser yamaji aibenbo mataloker," ta arishi küm 22 tain Swiatek-i ashi.

"Iba yongji ni tera mazüokteti akumer ama bilem. Yimya agi ni küsasa kü dang kechi inyaktüsü ashir, idangji ni asaya tajungba akumer. Tanü ni kanga anibelem aser tashi meliasü aser ni yamaji masayatet."

Rank 40 nung alila Kalinskaya asoshi Dubai Open tennis asayamung ya WTA 1000 semi-final mezüngbuba liasü aser la asoshi tour-level final mezüngbuba tongtetogo, kong lai Italy tsür Jasmine Paolini den asayatsü.

Taoba ita Australian Open asayamung nung Kalinskaya-i

Paolini tsükdakja la asoshi Grand Slam quarter-final mezüngbuba tongteta liasü. Tena ya maneni Honibar aonung ajuruteptsü.

Top seed Swiatek ya taoba asaya 26 nungi 25 nung takok ngur semi-final tonga liasü aser taoba hopta Doha nung takok anguba sülen ano Dubai nunga la asoshi takok marok mezüngbuba ngutettsü teimla nung liasü.

Kalinskaya ya qualifying round saksaka ajanget aser tan hopta matches tenet nung takok ngua lir aser lai Jelena Ostapenko aser Coco Gauff nungera tsükdaktsü.

"La asayar tajung lir. Ni süngjema melitetra aser ni tashi amshia masayara lai ni tsükdaktsütsü ta ni meteter liasü. Anungji ibaji kü tebilemba liasü, tashi amshia asayatsü aser la kanga asemzüdaktsütsü," ta arishi küm 25 tain Kalinskaya-i ashi.

2-4 agi Kalinskaya tajemba liasü saka games pezü atonga akok aser minute 53 nung mezüng set agia liasü.

Iba set mapang Russia tsür Kalinskaya-i break points tenet nungi trok nguteta liasü.

Sets tetsüngta Swiatek metzü meshitsü anisüngzüka liasü saka ajiaki la asaya yimya nung temelenshi meliasü.

Kasa anogo Centre Court nung Paolini-i Romania tsür Sorana Cirstea madak 6-2, 7-6 (8/6) agi takok ngua la asoshi WTA 1000 final mezüngbuba tongogo.

Arishi küm 28 tain Paolini yagi Dubai nung 11th seed Beatriz Haddad Maia, taoba US Open finalists Leylah Fernandez, eight seed Maria Sakkari nungertem tsükdaktsü liasü.

Hombarnü WTA ranking sayaba nung Paolina ya top 20 nung alitsü.

BILEMDANGANG

"Takok agi tepela bener arur masü, tepela agi takok bener arur."